

**Vorarlberger Landesarchiv, Urkunde Nr. 8599**

10. November 1570

Ich Fryckh Eberlin zu Thorenburen unnd Im Oberdorff gesessen Bekhenne offenntlich für mich all meine erben unnd Nachkomen unnd thun khundt Allermeniglich mit dem Brieff, das ich mit wolbedachtem Synn unnd gutt, Zittiger vorbetrachtung unnd guttem vorwyssenn, von meins bessten Nutz und fromen wegenn, dem Lieben Hailigen Sant Sebaistion patron der Cappellen Im Oberdorff, In Thorenburen, unnd von desselben wegen, Seinem geordneten pfleger Jörgen Frantzen Amptman des Thurns zu Thorenburen, unnd allen seinen Nachkhumen von derselebn pfleg wegenn, Umb Acht und Zwaintzig pfund pfenüg, gutter und genaumer ditzs Landtswerung dero ich von gedachtem Jörgen Frantzen von gedachter Cappell Aigen gutt unnd gelt, Also bar gar unnd gentslich gewert unnd bezallt bin unnd die an meinen gutten Nutz komen unnd gewendt sind Ainß stätten vestem Ewigen Zinß und kauffs Auffrecht und Redlich zu kauffen gegeben hab In Crafft diz Brieffs, Ain pfund Acht schilling pfenig Obgemeltter Rechtz steets Jerlichs und gewiß Ewigs Zinß unnd gelts zu Richern unnd zu geben, Von Ausser unnd ab meinem Aigen Weingarten mit Sampt dem Höwax unnd Krutgarten Alles bey unnd An Ain Andern unnd Im Weppach gelegen, stosst obna an Augustin Frantzen erben, zum andern an denn Stainnibach, zum drytten An Hannsen Bäsinger zum vierten an Weppacher gassenn, Unnd Ausser sollichem weingarten und desselben Nutzen Früchten Rechten gerechtgkaytten mit grund mit gratt gengen stegen unnd wegen, unnd namlich mit allen Zu unnd Ingehörungen nichts davon Außgenomen vorbehalten Noch Hindhan gesetzt, Ouch für frey Ledig unnd loß, Sonnst gegen meniglichem vor unverschrieben und unverkümbert In Allweg, Demnach Sollen unnd wollen, ich all mein Erben unnd Nachkhumen so obgedachte unnderpfandt Imer Innhaben der Obgedachten Cappell Allen Iren Innhaben pflegern und verwaltern unnd allen Iren Nachkumen das Obgemelt Ain pfund und acht schilling pfennig Zinß Nun Hinfüro Jerlich Ouch yedes Jarß allain unnd besonnder Allweg Auff Sannt Martins des hailigen Bischoffstag guettlich und früntlich Rychten geben und bezallen Unnd die zu gedachten Cappell Inhaber pflegern unnd verwaltern und Allen Iren Nachkomen zu Iren sichern Handen und gewalt Alhie zu Thorenpuren Antwurten One Alle Minderung Abgannng costen unnd schaden, und Ouch für aller meniglichs Ein unnd wyderred, Auch für aller meniglichs verpieten Niederlegen unnd Entweren. Dann wo ich mein erben Hier Inn Seumig wurden unnd disen Zinß nit Richen und geben In all weiß und mas wie Obstatt, So ist unnd Hayssen die Hier Inn verschrybnen unnderpfandnd Zinsfellig unnd zu Rechten Ewigem Aigen gefallen unnd verfallen, der Obgedachten Cappell Allen Iren Inhabern pflegern unnd verwaltern, unnd allen Iren nachkhumen Also das Sey Es fürrhen ewiglich sollen unnd mögen Innhaben, buwen Nutzen Niessen, versetzen, verkouffen, unnd damit gefarn schaffen, handeln thun und Lassen, Als mit anderm der Cappell und pfrond Aigen gutt, One mein unnd meiner Erben, noch meniglich von unnsere wegen, Sumen noch Iren weder mit noch One gericht Gaistlichenn noch weltlichen Indhain Weyß noch weg, unnd Hieruff diz Kouffs und Zinß Söllen unnd wöllen ich all mein erben unnd nachkomen der gedachten Cappellen und Irer Nachkhumen pflegern Recht gutt getruw weren hayssen unnd Sein, für all Abgenng Intrag unnd Ansprach nach dem Richten, All fort In unnsere Costen unnd one Iren schaden, unnd wie woll disser Brieff ainen Ewigen kauff, Außweyssett so ist mir dannocht die gnad beschechen, das ich all mein Erben, unnd nachkumen, disen Jerlichen Zinß woll wyder kauffern und ablössen müegen Nun hinfüro, welches Jars wir wellen, Doch Allweg Auf Obbestimpten Sant Martinstag unnd allweg mit dem Haupt – gutt, unnd mit den Erloffenen unnd unbezalten Zinsen unnd mit obgemelter Muntz und werung, Alles One Geuerde unnd des alles zu warem vesten urkhundt. So han ich Obgnenanter Frickh Eberlin mit Vleyß und Ernnt Erpetten den Ersamen Conradten Albrich der Ziett Aman zu Thornburen das er sein Aigenn Innsigel für mich all mein Erben (.doch der Herschafft Österreich Auch Ime Aman unnd Seinen Erben Inn allweg one schaden.) Offenntlich gehenckhte hatt an den Brieff, der geben ist an Sannt Martins des hailigen Bischoffs Abennd Nach Christi unnsere Lieben Herrn, unnd Seligmachers gepurt, Als Man Zalt tusennt fünffhundert und Im Sybenzigsten Jar.

Frickh Erberle Im Oberdorff zinst 11bd 8ßd  
1570. November 10.

Disser Brief ist in Cräfften zinst jetzt Caspar Ullmer und Martin Heffel